


| Tertib Surah | Nama Surah | Bilangan Ayat | Bilangan Ruku` | Makkiyyah / Madaniyyah | Tertib Turun | Bilangan Paragraf |
|--------------|------------|---------------|----------------|------------------------|--------------|-------------------|
| Ke-41 | Fushshilat | 54 | 6 | Makkiyyah | Ke-61 | 7 |



Zaman Diturunkan Surah Dan Latar Belakangnya

Dalam rangkaian surah-surah حواميم surah ini adalah surah kedua, ia diturunkan di akhir peringkat ketiga kehidupan Rasulullah di Mekah iaitu pada tahun ke-10 Kenabian. Berdasarkan sesetengah riwayat, terdapat petunjuk bahawa sebahagian daripadanya juga diturunkan pada bulan Zul Hijjah tahun ke-6 Kenabian setelah Sayyidina Hamzah dan Sayyidina `Umar memeluk agama Islam. Berdasarkan satu riwayat Tirmizi, jarak di antara dua orang sahabat agung Rasulullah s.a.w. itu menerima Islam hanya 3 hari sahaja, Sayyidina Hamzah terlebih dahulu memeluk agama Islam selepas itu Sayyidina `Umar pula memeluk agama Islam.

Surah ini juga dinamakan Fussilat, perkataan Fussilat diambil daripada ayat ke-3 dan ayat ke-44, ia bererti keterangan yang diberikan secara jelas dan terperinci.

Ketika orang-orang musyrikin Mekah terus menentang seruan Rasulullah s.a.w. dengan begitu hebat dan mereka terus berada dalam keraguan terhadapnya, surah ini diturunkan. Mereka mengkritik al-Qur'an berbahasa Arab, pemimpin-pemimpin Quraisy juga menghalang orang ramai daripada mendengar ayat al-Qur'an (Ayat: 26).

Hijrah ke Habsyah telahpun lama berlaku, pada ketika itu orang-orang musyrikin berpaling daripada seruan al-Qur'an, sikap pemimpin-pemimpin Quraisy yang musyrik betul-betul seperti pemimpin-pemimpin kaum `Aad yang sombong dan bongkak, mereka juga berkata مَنْ أَشَدُّ مِنَّا قُوَّةً (siapa lebih hebat dari kami?) (Ayat: 15).

Kaum `Aad telah dibinasakan dengan angin kencang yang terlalu sejuk dan petir yang dahsyat, kaum Tsamud juga dibinasakan dengan petir yang dahsyat. Kepada orang-orang Quraisy dikatakan: “Kamu juga seperti kaum `Aad dan Tsamud, telah menjadi musuh-musuh Allah (أَعْدَاءُ اللَّهِ)”. Orang-orang Islam yang bersabar dihiburkan bahawa para malaikat turun kepada mereka, orang-orang Islam terus berda`wah menyeru manusia kepada tauhid, mereka menolak keburukan dengan kebaikan di samping bersabar dan beristiqamah dalam berjuang. Di akhir surah terdapat satu ramalan bahawa tidak lama lagi akan nyata bukti-bukti kebesaran Allah di seluruh pelusuk bumi dan pada diri-diri manusia. Dalil-dalil آفاقي dan انفسى akan nyata menyokong kebenaran yang dibawa oleh Rasulullah s.a.w. dan para sahabatnya. Orang-orang kafir pula diberi amaran bahawa walaupun mereka tidak menerima pertemuan dengan tuhan di hari akhirat, Allah tetap mengepung mereka dan tidak lama lagi akan menghukum mereka.

Perkaitan Surah Fussilat (Hamim As-Sajdah) Dengan Surah Sebelum Dan Selepasnya

Di dalam Surah Mu'min sebelum ini, pihak berkuasa yang sombong, zalim dan mengikuti jejak langkah

Thaghut dan Fir'aun dinasihati supaya mengambil i'tibar daripada kebinasaan Fir'aun. Di dalam surah ini pula mereka diancam dengan kebinasaan yang telah menimpa kaum 'Aad dan kaum Tsamud, mereka dikatakan **أَعْدَاءُ اللَّهِ** (musuh Allah) yang akan masuk neraka, penyakit sebenar mereka juga dinyatakan iaitu **إِسْتِكْبَارٌ فِي الْأَرْضِ** (berlagak sombong di muka bumi). Kekasih-kekasih Allah (**أَوْلِيَاءُ اللَّهِ**) diberi berita gembira akan mendapat syurga, mereka adalah orang-orang yang beristiqamah atas iman mereka kepada Allah.

Beberapa Kata Kunci Dan Tema Utama Surah

1. Pengenalan tentang al-Qur'an diberikan bahawa ia diturunkan secara beransur-ansur (**تَنْزِيلٌ**) (Ayat: 1 dan 41). Al-Qur'an diturunkan dalam Bahasa Arab untuk memudahkan orang-orang Quraisy dan orang-orang Arab memahaminya, ayat-ayatnya dikemukakan dengan begitu jelas dan terang (**فُصِّلَتْ**) (Ayat: 3 dan 44).

2. Sikap pemimpin musyrikin Quraisy tentang al-Qur'an ialah mereka memerintahkan supaya pengikut-pengikut mereka tidak mendengar al-Qur'an, sebaliknya membuat hiruk-pikuk terhadapnya (Ayat: 26).

لَا تَسْمَعُوا لِهَذَا الْقُرْءَانِ وَالْقَوَا فِيهِ لَعَلَّكُمْ تَعْلَمُونَ ﴿٢٦﴾

Allah telah memberi nama **أَعْدَاءُ اللَّهِ** kepada pemimpin-pemimpin seperti itu, pemimpin-pemimpin seperti itu akan masuk neraka dan di sana mereka diberikan balasan buruk sesuai dengan tahap permusuhan mereka kepada Islam (Ayat: 19 dan 28).

3. Pemimpin-pemimpin Quraisy juga seperti kaum 'Aad dan kaum Tsamud, mengidap penyakit **إِسْتِكْبَارٌ فِي الْأَرْضِ**, seperti kebiasaan pemimpin-pemimpin Thaghut di sepanjang zaman. **إِسْتِكْبَارٌ فِي الْأَرْضِ** adalah satu istilah khusus al-Qur'an, ia bukan kesombongan manusia biasa, ia dikaitkan dengan 'di muka bumi', Istikbar adalah satu istilah khusus yang diberikan kepada pemerintah-pemerintah yang sombong, tidak beraqal dan keras kepala dalam menghadapi seruan Islam.

4. Di dalam surah ini terdapat nasihat kepada orang-orang kafir supaya menerima seruan tauhid. Nasihat supaya beristiqamah atas tauhid juga diberikan (Ayat: 6).

قُلْ إِنَّمَا أَنَا بَشَرٌ مِّثْلُكُمْ يُوحَىٰ إِلَيَّ أَنَّمَا إِلَهُكُمُ اللَّهُ وَاحِدٌ فَاسْتَقِيمُوا إِلَيْهِ وَاسْتَغْفِرُوهُ ۚ وَوَيْلٌ لِّلْمُشْرِكِينَ ﴿٦﴾

5. Berita gembira di dunia dan di akhirat diberikan kepada orang-orang yang beriman kepada Allah dan beristiqamah dengannya (Ayat: 30-32).

إِنَّ الَّذِينَ قَالُوا رَبُّنَا اللَّهُ ثُمَّ اسْتَقَمُوا تَتَنَزَّلُ عَلَيْهِمُ الْمَلَائِكَةُ

6. Orang-orang musyrikin bertindak memalingkan diri dan tidak menghiraukan seruan tauhid (Ayat: 4).

فَأَعْرِضْ أَكْثَرُهُمْ فَهَمٌ لَا يَسْمَعُونَ ﴿١٣﴾

(Ayat: 13).

فَإِنْ أَعْرَضُوا فَقُلْ أَنْذَرْتُكُمْ صَٰلِقَةً مِّثْلَ صَٰلِقَةِ عَادٍ وَثَمُودَ ﴿٣٣﴾

7. Surah ini sebenarnya mengemukakan perbandingan di antara pemimpin-pemimpin kafir Quraisy Mekah dan para sahabat yang beriman, orang-orang yang menolak seruan Islam diberi gelaran **أَعْدَاءُ اللَّهِ** (musuh-musuh Allah) dan orang-orang yang menerima seruan Islam lalu beristiqamah dengannya diberi gelaran **أَوْلِيَاءُ اللَّهِ** (kekasih-kekasih Allah). Para sahabat diberikan berita gembira tentang turunnya malaikat membela mereka. Antara sifat terpenting para sahabat ini ialah mereka adalah penda`wah dan penyeru kepada ajaran tauhid dan mereka juga menyeru manusia kepada Allah (Ayat: 33).

وَمَنْ أَحْسَنُ قَوْلًا مِّمَّنْ دَعَا إِلَى اللَّهِ وَعَمِلَ صَالِحًا وَقَالَ إِنَّنِي مِنَ الْمُسْلِمِينَ ﴿٣٣﴾